

四庫全書

史部

欽定四庫全書

史部

欽定續文獻通考卷九十二至九十四

給事中_臣陳化龍覆勘

總校官內閣中書_臣孫溶

欽定四庫全書

欽定續文獻通考卷九十二

王禮考

君臣冠冕服章

遼太祖丙寅歲即皇帝位朝服衷甲以脩非常其後行
瑟瑟禮大射柳即此服

太宗會同元年八月詔羣臣及年高凡授大臣爵秩皆
賜錦袍金帶白馬金飾鞍勒著於令 大同元年正月

欽定四庫全書

欽定續文獻通考

入晉後帝與南班漢官用漢服太后與北班契丹臣僚

用國服

其漢服即五代晉之遺制也

臣等謹按歐陽修五代史唐莊宗崩明宗遣供奉

官姚坤告哀於契丹見太祖於慎州錦袍大帶垂

後又太宗送晉高祖於潞州脫白貂裘以衣高祖

後伐晉以龍鳳赭袍賜趙延壽使衣以撫晉軍亦

以赭袍賜杜重威大同元年正月丁亥朔入汴京

視朝於廣政殿被中國冠服二月丁巳朔冠通天

冠服絳紗袍執大圭視朝三月丙戌朔服靴袍御
崇元殿入閣又將視朝有司給燕王趙延壽貂蟬
冠右僕射張礪三品冠服延壽與礪皆不肯服而
延壽別爲王者冠以自異礪曰吾在上國時晉遣
馮道奉冊北朝道齋二貂冠其一宰相韓延徽冠
之其一命我冠之令其可降服耶卒冠貂蟬以朝
此可補遼史太祖太宗兩朝所未載者

聖宗統和元年六月朔詔有司冊皇太后日給三品以

上法服三品以下用大射柳之服 開泰七年十一月
禁服用明金縷金貼金 太平五年二月禁天下服用
明金及金線綺國親當用者奏而後用 重熙五年十
月殿試賜進士第及緋衣銀魚 二十三年七月詔八
房族巾幘

道宗清寧元年九月詔除護衛士餘不得佩刀入宮非
勲戚後及額爾奇木副使承應諸執事人不得冠巾又
詔額爾奇木及副使之族並民奴賤不得服駝尼水獺

裘刀柄兒鵲鞍勒佩子不許用犀玉骨突犀惟大將軍
不禁 四年十二月弛駝尼水獺裘之禁 十年十一
月定吏民衣服之制 太康四年十一月禁士庶服用
綿綺日月山龍之文

臣等謹案馬端臨考冠冕服章自天子以
及士庶人皆載之今考遼史儀衛志條詳
國服漢服而士庶人之服畧可見於本紀
者如右

遼史儀衛志曰契丹轉居薦草之間去邃古之風
未遠自太祖仲父蘇呼名和爾以約尼氏裕悅之官
占居潢河沃壤始置城邑爲樹藝桑麻組織之教
太祖帝北方太宗治中國紫銀之鼠羅綺之筐襦
載而至織麗奩毳被土綢木於是定衣冠之制北
班國制南班漢制各從其便焉

國服之制

祭服

以祭山爲大禮服飾尤盛

大祀皇帝服金文金冠白綾袍紅

帶懸魚三山紅垂飾犀玉刀錯絡縫烏鞞小祀皇帝
硬帽紅克絲龜文袍

朝服皇帝服實魯袞冠絡縫紅袍毳飾犀玉帶錯絡

縫鞞

謂之國服袞冕太宗更以錦袍金帶

臣僚載獬冠金花爲飾或加

珠玉毳毛額後垂金花織成夾帶中貯髮一總或紗

冠制如烏紗帽無簷不撮雙耳額前綴金花上結紫

帶末綴珠服紫窄袍繫鞞鞞帶以紅黃色絛裏革爲

之用金玉水晶靛石綴飾

謂之盤紫太宗更以錦袍金帶即會同元年賜高年

有爵
秩者

公服

謂之展
裹著紫

皇帝紫皂幅巾紫窄袍玉束帶或衣紅

襖臣僚以幅巾紫衣

常服

宰相中謝儀帝常服高麗使入
見儀羣臣僚便衣謂入盤裹

綠花窄袍綠中

單多紅綠色貴者披貂裘以紫黑色爲貴青次之又
有銀鼠尤潔白賤者貂毛羊鼠沙狐裘

臣等謹按常服一條或疑志文未分出帝與臣僚

者是不考注語乃合帝與臣僚言之也或謂專指

冬裘而以貴賤二字分言臣僚者是不知窄袍中
單不必冬間始服之也若謂皇帝常服即漢服之
柘黃袍等則更鶻突不足辨矣

田獵服皇帝幅巾擐甲戎裝以貂鼠或鵝項鴨頭爲
扞腰番漢諸司使以上並戎裝衣皆左衽黑綠色

弔服素服乘赭白馬

太祖時叛弟埒克
等降素服受之

漢服之制

儀衛志曰唐以冕冠青衣爲祭服通天絳袍爲朝

服平巾幘袍襴爲常服遼太宗會同元年自晉北

歸始用唐晉文物矣

祭服

終遼之世郊丘不建大裘冕服不書

衮冕祭祀宗廟遣上將出征

飲至加元服納后若元日受朝則服之金飾垂白珠

十二旒以組爲纓色如其綬鞋續充耳玉簪導元衣

纁裳十二章

八章在衣日月星辰龍華蟲火山宗彝四章在裳藻粉米黼黻

衣標領

爲升龍織成文各爲六等龍山以下每章一行行十

二白紗中單黼領青標

袖襪端綬衣

裾蔽草帶大帶劒佩

綬舄加金飾

元日朝會儀
皇帝服袞冕

朝服皇帝通天冠諸祭還及冬至朔日受朝臨軒拜

王公元會冬會服之冠加金博山附蟬十二首施珠

翠黑介幘髮纓翠綬玉若犀簪導絳紗袍白紗中單

褙領朱襪裾白裙襦絳蔽膝白假帶方心曲領其革

帶佩劔綬襪舄若未加元服則雙童髻空頂黑介幘

雙玉導加寶飾

元日上壽儀皇帝
服通天冠絳紗袍

皇太子遠遊冠

謁廟還宮元日冬至朔日入朝服之三梁冠加金附

蟬九首施珠翠黑介幘髮纓翠綾犀簪導絳紗袍白
紗中單皂領標襪裾白裙襦白假帶方心曲領絳紗
蔽膝其革帶劔佩綬襪舄與皇帝同後改用白襪黑

舄未冠則雙童髻空頂黑介幘雙玉導加寶飾

冊皇太子

儀皇太子冠遠遊服絳紗袍

親王遠遊冠陪祭朝饗拜表大事

服之冠三梁加金附蟬黑介幘青綾導絳紗單衣白
紗中單皂領襪裾白裙襦革帶鈎釧假帶曲領方心
絳紗蔽膝襪舄劔佩綬 二品以上同親王 諸王

遠遊冠三梁黑介幘青綾 三品以上進賢冠三梁
寶飾 五品以上進賢冠二梁金飾 六品以上進
賢冠一梁無飾 七品以上去劔佩綬 八品以下
同公服

儀衛志曰景宗乾亨四年聖宗即位冊承天太后
給三品以上法服雜禮冊承天太后儀侍中就席
解劔脫履興宗重熙五年尊號冊禮皇帝服龍袞
北南臣僚並朝服蓋僚制會同中太后北面臣僚

國服皇帝南面臣僚漢服乾亨以後大禮雖北面
三品以上亦用漢服重熙以後大禮並漢服常朝
仍遵會同之制

臣等謹按以上所載儀衛志雖分祭服朝服然朝
服亦見於祭祭服亦見於朝正如國服之金文金
冠與實薛里袞名雖異而實互用也

公服

勅箭儀閣使公服繫履遼國常用公服矣

皇帝翼善冠朔視朝用

之柘黃袍九環帶白練裙襦六合鞬 皇太子遠遊

冠五日常朝元日冬至受朝服之絳紗單衣白裙襦
革帶金鈎鞞假帶方心紛擊囊白襪烏皮履 一品
以下五品以上冠幘纓簪導謁見東宮及餘公事服
之絳紗單衣白裙襦帶鈎鞞假帶方心襪履紛擊囊
六品以下冠幘纓簪導去紛擊囊餘並同

常服

謂之穿執起居禮臣僚
穿執言穿鞞執笏也

皇帝柘黃袍衫折上頭

巾九環帶六合鞞

起自宇文氏唐太宗貞觀以後非
元日冬至受朝及大祭祀皆常服

而已

皇太子進德冠九珙金飾絳紗單衣白裙襦白

鞮烏皮履

五品以上幘頭

亦曰折上巾

紫袍牙笏金玉

帶文官佩手中算袋刀子礪石金魚袋武官鞬鞞七

事佩刀刀子磨石契苾真噦厥計筒大石袋烏皮六

合鞮

六品以下幘頭緋衣木笏銀帶魚袋佩鞮同

八品九品幘頭綠袍鍬石帶鞮同

臣等謹按國服漢服具詳如右更有見於諸儀者

如皇帝受冊儀帝至閤服袞冕宰相中謝儀帝常服升殿冊皇太子儀令史二人絳服舉案常朝起

居儀昧爽臣僚朝服幘頭袍笏入朝各起居畢退
還幕次公服紫衫帽告廟謁廟儀臣僚昧爽朝服
詣廟賀生皇子及賀祥瑞儀北南臣僚金冠盛服
合班入正座儀天慶二年冬教坊並服袍藏闥儀
北面臣僚常服入賜進士章服儀臣僚公服宣勅
後引進士至章服所更衣此又君臣冠服可補儀
衛志所未備者

金太祖天輔七年九月諸王宗幹等以赭袍被太宗體

眞璽懷中即皇帝位

初即位始服赭黃自後視百官朝御袍帶

熙宗天眷二年四月百官朝叅初用朝服六月朔帝初御冠服

次年有司以車駕將幸燕京合用通天冠絳紗袍據

見闕名件依式成造禮服袍裳方心曲領中單蔽膝革

帶大帶玉具劔綬佩舄襪乘輿服大綬六采

黑黃赤
白縹綠

小綬三色同大綬間施三玉環大綬五百首小綬半

之白玉雙佩革帶玉鈎鐔

金史輿服志曰金制皇帝服通天絳紗袞冕偃鵩
臣僚有貂蟬法服所謂朝服也章宗時禮官請更
制祭服青衣朱裳去貂蟬豎筆以別於朝服惟公
服則又有紫緋綠三等之服與夫窄紫服展皂等事
皇統元年正月上尊號初御袞冕

世宗大定七年六月命地衣龍文者罷之七月禁服用
金線其織賣者皆抵罪十二年五月禁百官及承應

人不得服純黃油衣

先是九年三月禁民間稱言銷金條理內舊有者改作明金字至十三年十一月吏部尚書梁肅請禁奴婢服羅綺帝曰近已禁其服明金行之以漸可也且教化之行當自貴近始朕宮中服御常自儉約舊服明金者已減大半矣近民間風俗比正隆時聞稍淳儉卿等當更務從儉素使民知所效也

十五年閏九月詔親王百官僮人所服紅紫改爲黑紫

二十年四月制宗室及外戚并一品命婦衣服聽用
明金 二十五年五月命尚書省奏事衣窄紫

章宗明昌六年七月始定文武官六貫石以上承應人
并及廕者若在籍儒生章服制

承應及廕者許用牙領紫圓板皂條羅帶皂鞞上得
兼下係籍儒生止服白衫領繫背帶並以紫圓條羅
帶乾皂鞞餘人用純紫領不得用緣雜色圓板條羅
帶不得用紫鞞用黃及黑油皂蠟等婦人各從便

與服制載章宗即位有司請御純吉不許乃服淡黃袍烏犀帶常朝則服小帽紅襴偏帶或束帶附錄於此

皇帝冕服

冕制天板長一尺六寸廣八寸前高八寸五分後高九寸五分身圍一尺八寸三分并納言並用青羅爲表紅羅爲裏周圍用金稜天板下有四柱四面珍珠網結子花素墜子前後珠旒共二十四旒各長一尺

二寸青碧線織造天河帶一長一丈二尺濶二寸兩
頭各有真珠金翠旒三節玉滴子節花紅線組帶二
上有真珠金翠旒玉滴子節花下有金鐸子二枚紅
線款幔帶一釭纈二真珠垂繫上用金葦子二簪窠
款幔組帶鈿窠各二內組帶鈿窠四並玉鏤塵碾造
玉簪一頂方二寸導長一尺二寸簪頂刻鏤塵雲龍
袞用青羅夾製五采間金繪畫正面日一月一升
龍四山十二上下襟華蟲火各六對背面星一升龍

四山十二華蟲火各十二對虎雖各六對中單一白

羅單製羅領褱襖裳一帶褱襖紅羅八幅夾製繡藻

三十一粉米各十六黼黻各三十二蔽膝一帶褱襖

並紅羅夾製繡升龍二綬一幅大綬以

赤黃黑
白綠縹

六采

織紅羅托裏小綬三色同大綬銷金黃羅綬頭上間

施三玉環皆刻雲龍大綬五百首小綬半之緋白大

帶一銷金黃羅帶頭鈿窠二十四紅羅勒帛一青羅

抹帶一玉佩二白玉上中下璜各一半月各二皆刻

雲龍玉滴子各二皆以真珠穿製金篋鈎獸面水葉
環釘涼帶一紅羅裏鏤金上有玉鵝七鉈尾束各一
金攀龍口以玳瑁板襯釘脚烏重底紅羅面白綾托
裏如意頭銷金羅緣口玉鼻二飾以珠襪用緋羅加
錦

輿服志曰皇帝凡大祭祀加尊號受冊寶則服袞
冕行幸齋戒出宮或御正殿則通天冠絳紗袍

臣等謹按大綬五百首所謂首者凡合單紡爲一

系四系爲一扶五扶爲一首見明史輿服志注

皇太子冠服

冕用白珠九旒紅絲組爲纓青纁充耳犀簪導袞青

衣朱裳

五章在衣山龍華蟲火宗
彝四章在裳藻粉米黼黻

白紗中單青標襪

裾玉帶塗金銀鉤黼蔽膝隨裳色

爲火山
二章

瑜玉雙佩

四采織成大綬間施玉環三白襪朱舄舄加金塗銀

釳謁廟則服之遠遊冠十八梁金塗銀花飾博山

附蟬紅絲組爲纓犀簪導朱明服紅裳白紗中單方

心曲領絳紗蔽膝白襪黑舄餘同衮冕受冊寶則服之

輿服志曰太子入朝起居及與宴則朝服紫袍玉帶雙魚袋其視事及見師少賓客則服小帽皂衫玉束帶

臣下朝服

正一品貂蟬籠巾七梁額花冠貂鼠立筆銀立筆犀簪導佩劔緋羅大袖緋羅裙緋羅蔽膝各一緋白羅

大帶天下樂暈錦玉環綬一白羅方心曲領白紗中
單銀褐勒帛各一玉珠佩二金塗銀革帶烏皮履白
綾襪 正二品七梁冠銀立筆犀簪導不佩劔緋羅
大袖雜花暈錦玉環綬餘並同 正四品五梁冠銀
立筆犀簪白獅錦銀環綬珠佩銀革帶御史中丞則
獬豸冠青荷蓮綬餘並同 正五品四梁冠簇四金
鵬錦銅環綬銀珠佩餘並同 正六品至七品三梁
冠黃獅錦銅環綬銀珠佩銅束帶餘並同

輿服志曰凡導駕及行大禮文武百官皆服之如
右大定二十二年祫享攝官導駕二品冠七梁三
品四品冠六梁服有金花五品冠五梁六品冠四
梁七品冠三梁監察御史獬豸冠青綬八品九品
冠二梁餘製並同

三品
舊無

祭服

熙宗皇統七年太常寺言太廟成後奉安神主祫享
行禮凡行事執事助祭陪位官准古典當服衮冕九

章畫降龍隨品各有等差通典云虞夏殷並十二章
日月星辰山龍華蟲作繪於衣宗彝藻火粉米黼黻
絺繡於裳周升三辰於旂登龍於山登火於宗彝作
九章之服山龍華蟲火宗彝繪於衣藻粉米黼黻繡
於裳公之服自衮冕而下如王之服侯伯之服自鷩
冕而下如公之服又後魏帝服衮冕與祭者皆朝服
又開元禮一品服九章又五禮新儀正一品服九旒
冕犀簪青衣畫降龍令汴京舊禮直官言自宣和二

年以後一品祭服七旒冕大袖無龍唐雖服九章服當時司禮少常伯孫茂道言諸臣之章雖殊然飾龍名袞尊卑相亂請三公服鷩冕八章爲宜臣等竊謂歷代衣服之制不同若從後魏則止服朝服或用宋服則爲七章若遵唐九章則有飾龍名袞尊卑相亂之議尚書省乃奏用後魏故事止用燕京大冊禮時所服朝服以祭

世宗大定三年八月詔遵皇統制攝官則朝服散官

則公服以皇太子爲亞獻服袞冕十四年用唐制若
祭遇雨雪則服常服謂今之公服也

章宗泰和元年八月禮官言祭服所以接神朝服所
以事君雖歷代損益不同然未嘗不有分別是以袞
冕十二旒元衣纁裳脩十二章天子之祭服也通天
冠絳紗袍紅羅裳天子之視朝服也臣下之服則用
青衣朱裳以祭朱衣朱裳以朝國朝爲天子脩袞冕
通天冠二等之服今羣臣但有朝服而祭服尚缺每

有祀事但以朝服從事實於典禮未當請依漢唐故事祭服冕旒畫章然君臣冕服雖章數各殊而俱飾龍名袞唐孫茂道已有尊卑相亂之論今三公法服有龍恐傷於僭國初禮官亦嘗駁議乞叅酌古今改置祭服其冠則如朝冠而但去其貂蟬豎筆其服用青衣朱裳白襪朱履非攝事者則用朝服庶幾少有差別帝曰朝祭之服固宜分也

公服

大定官制文資五品以上官服紫三師三公親王宰相一品官服大獨科花羅徑不過五寸執政官服小

獨科花羅徑不過三寸二品三品服散搭花羅

謂無枝葉

者徑不過寸半四品五品服小雜花羅

謂花頭碎小者

徑不

過一寸六品七品服緋芝蔴羅八品九品服綠無紋

羅應武官皆服紫凡散官執事皆從一高上得兼下

下不得僭上窄紫亦同服色各依官制品級其諸局

分承應人並服無紋素羅十五年制曰袍不加襴非

古也遂命文資官公服並加欄

帶制皇太子玉帶佩玉雙魚袋親王玉帶佩玉魚一品玉帶佩金魚二品笏頭球文金帶佩金魚三品四品荔枝或御仙花金帶並佩金魚五品服紫者紅鞵烏犀帶佩金魚服緋者紅鞵烏犀帶佩銀魚服綠者並皂鞵烏犀帶武官一品二品佩帶同三品四品金帶五品六品七品紅鞵烏犀帶皆不佩魚八品以下並皂鞵烏犀帶司天太醫內侍教坊服皆同文武官

惟不佩魚應殿庭承應五品以下官非入內不許金帶又展紫入殿庭者並許服紅鞋不佩魚又二品以上官許兼服通犀帶三品官若治事及見賓客許兼服花犀帶

大定二年制百官趨朝赴省並須裹帶五品以上官趨朝則朝服赴省則展皂雨雪沾衣則從便凡朝叅主寶主符展紫御仙花或太平花金束帶近侍給使供御筆硯直長符寶吏紫襖子塗金束帶輪直則近

侍給使並常服常服則展紫閣門六尚遇朝叅侍立
則服本品服若宮中當直則服窄紫金帶學士院官
修起居注補闕拾遺秘書丞郎朝叅侍立則服本品
服色帶當直則窄紫金帶東宮左右衛率僕正副僕
正典儀贊儀內直郎丞當直亦許服之太子太師出
入宮中則展紫至東宮則展皂三少則展紫

衣服通制

金之常服四帶巾盤領衣烏皮鞢其束帶曰吐鵲巾

之制以皂羅若紗爲之上結方頂折垂於後頂之下
際兩角各綴方羅徑二寸許方羅之下各附帶長六
七寸當橫額之上或爲一縮襞積貴顯者於方頂循
十字縫飾以珠其中必貫以大者謂之頂珠帶旁各
絡珠結綬長半帶垂之海陵賜大興國者是也

大興國傳

海陵既立賜興國真珠巾玉
鈎帶玉佩刀及玉校鞍轡

其衣色多白三品以皂

窄袖盤領縫掖下爲襞積而不缺袴其胸臆肩袖或
飾以金繡從春水之服則多鶻捕鵝雜花卉之飾從

秋山之服則以熊鹿山林爲文其長中翥取便於騎也吐鵲玉爲上金次之犀象骨角又次之鍔周韞小者間置於前大者施於後左右有雙鉞尾納方束中其刻琢多如春水秋山之飾左佩牌右佩刀刀貴鑲柄尚鷄舌木黃黑相半有黑雙距者爲上或三事五事實飾以髣髴髣髴者謂髴皮斑文色殷紫如髣中豆髴也產其國故尚之鏤

口飾以鮫或屑金鍮和漆塗鮫隙而礪平之

大定十三年太常寺擬士人及僧尼道女官有師號

并閒官八品以上許服花紗綾羅絲紬在官承應有
出身人帶八品以下官未帶官亦同許服花紗綾羅
紵絲絲紬家屬同婦人許用珠爲首飾其都孔目與
八品閒官同京府州縣司吏皆與庶人同庶人止許
服純紬絹布毛褐花紗無文素羅絲綿其頭巾繫腰
領帕許用芝蔴羅縐用絨織成者不得以金玉犀象
珠寶瑪瑙玻璃之類爲器皿及裝飾刀靶鞘并銀裝
釘床榻之類兵卒許服無文壓羅純紬絹布毛褐奴

婢止許服純紬絹布毛褐娼優遇迎接公庭承應許
暫服繪畫之服其私服與庶人同

泰和四年以親王品官既分領緣而復有皂鞬之禁
似涉太繁遂聽親王用銀褐領紫緣品官皆紫領白
緣餘同明昌制

輿服志曰明昌間帝謂宰臣曰今風俗侈靡莫若
律以制度使貴賤有等其令禮部具典故以聞既
而以禮部所擬太繁以尚書省所擬行之帝以風

俗爲言可謂知所務矣

臣等謹按輿服志又載書袋之制大定十六年世宗以吏員與士民之服無別潛入民間受賕鬻獄有司不能檢察遂定懸書袋之制省樞密院令譯史用紫紵絲爲之臺六部宗正統軍司檢察司以黑斜皮爲之寺監隨朝諸局并州縣並黃皮爲之各長七寸濶二寸厚半寸並於束帶上懸帶公退則懸於便服違者所司糾之附錄於此

元憲宗壬子年八月祭天於日月山始用冕服

世宗至元三年二月初製太常禮樂工冠服 六年七

月製太常寺祭服十月定朝儀物色 七年十一月禁

繒段織日月龍虎及以龍犀飾馬鞍者

成宗大德六年三月祭天於麗正門外分獻官以下諸
執事各具公服行禮

時大都未有郊壇大禮用公服自此始

九年十一月冬至祭享用冠服依宗廟見用者制

其後節次祭祀或合祀天地增配位從祀獻攝執事
續置冠服於法服庫收掌法服二百九十有九公服
二百八十窄紫二百九十有五

輿服志曰武宗至大間太常博士李之紹王天佑
疏陳親祀冕無旒服大裘而加衮裘以黑羊皮爲
之臣下從祀冠服歷代所尚其制不同集議得依
宗廟見用冠服制度

仁宗延祐元年十二月定官員士庶服色等第

詔曰比年以來所在士民靡麗相尚尊卑混淆僭禮
費財朕所不取貴賤有章益明國制儉奢中節可阜
民財命中書省定之

英宗至治元年七月禁服色踰制

天子冕服

袞冕制以漆紗上覆曰紕青表朱裏紕之四周匝以
雲龍冠之口圍縈以珍珠紕之前後旒各十二以珍
珠爲之紕之左右繫紕纁二繫以元紕承以玉瑱纁

色黃絡以珠冠之周圍珠雲龍網結通翠柳調珠經
上橫天河帶一左右至地珠鈿窠網結翠柳朱絲組
二屬諸筭爲纓絡以翠柳調珠簪以玉爲之橫貫於
冠 袞龍服制以青羅飾以生色銷金帝星一日一
月一升龍四復身龍四山三十八火華蟲虎雖各四
十八 裳制以緋羅其狀如裙飾以文繡凡一十六
行每行藻二粉米一黼黻各二 中單制以白紗絳
緣黃勒帛副之 蔽膝制以緋羅有標緋絹爲裏其

形如襜袍上著之繡複身龍 玉佩珩琚瑤衝牙各

一璜二衝牙以繫璜珩下有銀獸面塗以黃金雙璜

夾之次又有衝下有衝牙旁別施雙的以鳴用玉

大帶制以緋白二色羅合縫爲之 玉環綬制以納

石失

金錦也

上有三小玉環下有青絲織網

紅羅韉

制以紅羅爲之高鞞 履制以納石失有雙耳二帶

鉤飾以珠 韉制以紅綾

世祖至元十二年十一月博士議擬冕天板長一尺

六寸廣八寸前高八寸五分後高九寸五分身圍一尺八寸三分并納言用青羅爲表紅羅爲裏周圍緣以黃金天板下四面珠網結子花素陞子前後共二十有四旒以珍珠爲之青碧線織天河帶兩頭各有珍珠金翠旒三節玉滴子節花金紅線組帶二上珍珠金翠旒玉滴子下有金鐸二梅紅繡款幔帶二註續二珍珠垂繫上用金葶子二簪窠款幔組帶鈿窠各二內組帶窠四並鏤玉爲之玉簪一頂面鏤雲

龍袞衣用青羅夾制五采間金繪日月星辰山龍華蟲宗彝正面日一月一升龍四山十二上下襟華蟲火各六對虎雉各六對背星一升龍四山十二華蟲火各十二對虎雉各六對中單用白羅單製羅領襖襖裳一帶襖襖全紅羅八幅夾造上繡藻粉米黼黻藻三十三粉米十六黼黻各三十二蔽膝一帶襖襖紅羅夾造八幅上繡升龍二綬一副六采織造紅羅托裏小綬三色同大綬銷金黃羅綬頭全上間施三

玉環並碾雲龍緋白大帶一銷金黃帶頭鈿窠二十
有四紅羅勒帛一青羅抹帶一佩二玉上中下璜各
一半月各二並碾玉爲雲龍文玉滴子各二並珍珠
穿造金毘鉤獸面水葉環釘全涼帶一紅羅裏鏤金
爲之上爲玉鵝七撻尾束各一金攀龍口玳瑁襯釘
鷄一重底紅羅面白綾托裏如意頭銷金黃絹緣口
玉鼻飾以珍珠金緋羅錦襪一兩

成宗大德十一年九月博士議唐制天子袞冕垂白

珠十有二旒以組爲纓色如其綬黠纁充耳玉簪導

元衣纁裳凡十二章

八章在衣日月星辰山龍華蟲
火宗彝四章在裳藻粉米黼黻

標領爲升龍皆織成之龍章以下每章一行每行十

二白紗中單黼領青標褱裾黻加龍山火三章毳冕

以上火山二章繡冕山一章元冕無章革帶大帶玉

佩綬襪與上同舄加金飾享廟謁廟及朝遣上將征

還飲至踐阼加元服納后元日受朝及臨軒冊拜王

公則服之又宋制天子服有袞冕廣尺二寸長四寸

前後十有二旒二纓並貫珍珠又有珠旒十二碧鳳
銜之在珠旒外晃板以龍鱗錦表上綴玉爲七星傍
施琥珀餅犀各二十四周綴金絲網鈿以珍珠雜寶

玉加紫雲白鶴錦裏四柱飾以七寶紅綾裏金飾玉

簪導紅絲條組帶亦謂之平天冠袞服青色

日月星
山龍雉

虎
雌七章紅裙

藻火粉
米黼黻

五章紅蔽膝升龍二並織成間

以雲彩飾以金釵花鈿窠裝以珍珠琥珀雜寶玉紅
羅襦裙繡五章青標襪裾六采綬一小綬三結三玉

環三素大帶朱裏青羅四紳盤結

綬帶飾並同衮服

白帶中

單青羅袜帶紅羅勒帛鹿盧玉具劔玉纁首鏤白玉
雙佩金飾貫珍珠金龍鳳革帶紅襪赤舄金釵花四
神玉鼻祭天地宗廟受冊尊號元日受朝冊皇太子
則服之事未果行至英宗延祐七年七月命禮儀院
使八思吉斯傳旨令省臣與太常禮儀院速製法服
八月中書省會集翰林集賢太常禮儀院官講儀依秘
書監所藏前代帝王衮冕法服圖本命有司製如其

式

皇太子冠服

衮冕 元衣 纁裳 中單 蔽膝 玉佩 大綬

朱韉 赤舄

至元十二年博士擬衮冕制用白珠九旒紅絲組爲

纓青纁充耳犀簪導青衣朱裳九章

五章在衣山龍
華蟲火宗彙四

章在裳藻
粉米黼黻白紗中單青褙襖裾革帶塗金銀鉤黼蔽

膝隨裳色爲火山二章瑜玉雙佩四采織成大綬間

施玉環三白韞朱舄舄加金塗銀釦

大德十一年九月詔擬前代制度唐制皇太子衮冕

垂白珠九旒紅絲組爲纓青纁充耳犀簪導元衣纁

裳九章

五章在衣龍山華蟲火宗
桑四章在裳藻粉米黼黻

織成之每行一章

黼黻重以爲等每行九白紗中單黼領青標襪裾革

帶金鉤釵大帶蔽膝隨裳色火山二章玉具釵金寶

飾玉纁首瑜玉雙佩朱組帶大綬四采

赤白
纁紺

純朱質

長丈八尺首廣九寸小雙綬長二尺六寸色同大綬

而首半之間施玉環三朱韉赤舄加金飾侍從祭祀
及謁廟加元服納妃服之宋制皇太子衮冕垂白珠
九旒紅絲組爲纓青纁充耳犀簪導青衣朱裳九章

五章在衣山龍華蟲火宗
彝四章在裳藻粉米黼黻

白紗中單青襜褕革帶塗

金銀鈎襍蔽膝隨裳色火山二章瑜玉雙佩四采織
成大綬間施玉環三白韉朱舄舄加塗金銀飾加元
服從祀受冊謁廟朝會服之已擬其制未果造

三獻官及司徒大禮使祭服

龍巾貂蟬冠五青羅服五

領袖襖俱用皂綾

紅羅裙五

襖用皂綾

紅羅蔽膝五

其羅花樣俱係牡丹

白紗中單五

黃綾帶

紅組金綬

紳五象笏銀束帶玉佩白羅方心曲領各五赤革履

白綾襪各五對

助奠以下諸執事官冠服

貂蟬冠獬豸冠七梁冠六梁冠五梁冠四梁冠三梁

冠二梁冠二百青羅服二百

領袖襖俱用皂綾

紅綾裙二百

襖用皂綾

紅羅蔽膝二百紫羅公服二百

用梅花羅

白紗中單

二百黃綾帶織金綬紳二百紅一百九十八青銅束帶

二百白羅方心曲領二百銅佩二百展角幘頭二百

塗金荔枝帶三十烏角帶一百七十皂鞢赤革履白

綾襪各二百對象笏三十銀杏木笏一百七十

輿服志曰凡獻官諸執事行禮俱依法服惟監察

御史二冠獬豸服青綬凡迎香讀祝及祝日遇陰

雨俱衣紫羅公服六品以下皆得借紫又都監庫

祠祭局儀鸞局神厨局頭目長行人等交角幘頭

窄袖紫羅服塗金束帶各五十皂鞞五十對

社稷祭服

青羅袍白紗中單紅梅花羅裙各一百二十三藍織
錦銅環綬紳二紅織錦銅環綬紳一百一十七紅織
錦玉環綬紳四紅梅花羅蔽膝草履白綾襪白羅方
心曲領黃綾帶及佩各一百二十三銅珩璜者一百
一十九玉珩璜者四藍素紵絲帶一百二十三銀帶
四銅帶一百一十九冠一百二十三水角簪金梁冠

一百七紗冠一十獬豸冠二籠巾紗冠四木笏紫羅
公服黑漆幘頭各一百二十三展角全二色羅挿領
一百二十三鍍金銅荔枝帶一十角帶一百一十三
象笏一十三木笏一百一十黃絹單袍複紫紵絲抹
口青氈鞵皂鞵各一百二十三窄紫羅衫黑漆幘頭
銅束帶黃絹單包複皂鞵紫紵絲抹口青氈鞵各三
十

宣聖廟祭服

獻官法服七梁冠三

簪

鴉青袍三絨錦綬紳三

各帶青絨

銅并鋼環二

方心曲領藍結帶銅佩紅羅裙白絹中單紅

羅蔽膝草履各三

白絹襪全

執事儒服軟角唐巾白襪

挿領黃鞞角帶皂鞞各九十有八

曲阜祭服連蟬

冠四十有三七梁冠三五梁冠三十有六三梁冠四

皂紵絲鞋三十有六兩舒角幘頭二軟角唐巾四十

角簪四十有三冠纓四十有三副

凡八十條有六

象牙笏七

木笏三十有八玉佩七

凡十有四繫

銅佩三十有六

凡七十有

二帶八十有五藍鞵帶七紅鞵帶三十有六烏角帶

二黃鞵帶烏角偏帶四十大紅金綬結帶七

上用玉環十有

四青羅大袖夾衣七紫羅公服二褐羅大袖衣三十

有六白羅衫四十白絹中單三十有六白紗中單七

大紅羅夾蔽膝七大紅夾裳緋紅羅夾蔽膝三十有

六緋紅夾裳四黃羅夾裳三十有六黃羅大帶七白

羅方心曲領七紅羅綬帶七黃絹大帶三十有六皂

鞵白羊毳鞵各四十有二對大紅羅鞋七輞白絹夾

鞮四十有三鞞

天子濟遜

冬之服凡十有一等服納奇實克默爾里克則冠金
錦暖帽服大紅桃紅紫藍綠布哩葉蘇則冠七寶重
頂冠服紅黃粉皮則冠紅金荅子暖帽服白粉皮則
冠白金荅子暖帽服銀鼠則冠銀鼠暖帽其上並加
銀鼠比肩俗稱襪子連呼夏之服凡十有五等服塔納圖納
奇實綴大珠於金則冠寶頂金鳳釵笠服蘇布特圖納奇

實

綴小珠於金錦

則冠珠子捲雲冠服納奇實則帽亦如之

服大紅珠寶里紅毛子塔納則冠珠緣邊鈸笠服白

毛子金絲寶里則冠白藤寶貝帽服馳褐毛子則亦

如之服太紅綠藍銀褐棗褐金繡龍五色羅則冠金

鳳頂笠各隨其服之色服金龍青羅則冠金鳳頂漆

紗冠服珠子褐七寶珠龍荅子則冠黃雅庫特寶貝

珠子帶後簷帽服青蘇普金絲闌子則冠七寶漆紗

帶後簷帽

百官濟遜

冬之服凡九等大紅納奇實一大紅克默爾里克一
大紅冠素一桃紅藍綠冠素各一紫黃鴉青各一夏
之服凡十有四等素納奇實一聚線布哩葉蘇納奇
實一棗褐渾金間絲蛤珠一大紅官素帶布哩葉蘇
一大紅明珠荅子一桃紅藍綠銀褐各一高麗鴉青
雲袖羅一駝褐茜紅白毛子各一鴉青官素帶布哩
葉蘇一

輿服志曰濟遜內廷大宴則服之冬夏之服不同然無定制凡勲戚大臣近侍賜則服之下至於樂工衛士皆有其服精粗之制上下之別雖不同總謂之濟遜云

百官公服

公服制以羅大袖盤領俱右衽一品紫大獨科花徑五寸二品小獨科花徑三寸三品散荅花徑二寸無枝葉四品五品小雜花徑一寸五分六品七品緋羅小

雜花徑一寸八品九品綠羅無文 幘頭漆紗爲之
展其角 笏制以牙上圓下方或以銀杏木爲之
偏帶正從一品以玉或花或素二品以花犀三品四
品以黃金爲荔枝五品以下以烏犀並八胯鞞用朱
草 鞞以皂皮爲之

儀衛服色

交角幘頭其制巾後交折其角 鳳翅幘頭制如唐
巾兩角上曲而作雲頭兩旁覆以兩金鳳翅 學士

帽制如唐巾兩角如匙頭下垂 唐巾制如幘頭而
櫛其角兩角上曲作雲頭 控鶴幘頭制如交角金
縷其額 花角幘頭制如控鶴兩角及額上簇象生
雜花 錦帽制以漆紗後幅兩旁前拱而高中下後
畫連錢錦前額作聚文 平巾幘黑漆革爲之形如
進賢冠之籠巾或以青或以白 武弁制以皮加漆
甲騎冠制以皮加黑漆雌黃爲緣 抹額制以緋
羅繡寶花 巾制以絀五色畫寶相花 兜鍪制以

皮金塗五色各隨其甲

視甲制如雲肩青錦質緣

以白錦裏以氈裏以白絹 雲肩制如四垂雲青緣

黃羅五色嵌金爲之 襖襠制如衫 視袍制用緋

錦武士所以裼襖襠 士卒袍制以絹純繪寶相花

窄袖袍制以羅或純 辨線襖制如窄袖衫腰作

辨線細摺 控鶴襖制以青緋二色錦圓荅寶相花

窄袖襖長行與士所服紺緞色 樂工襖制以緋

錦明珠琵琶窄袖辨線細摺 甲覆膊腋心扞背扞

股制以皮或爲虎文獅子文或施金鎧鎖子文臂
鞬制以錦綠絹爲裏有雙帶錦螭蛇束麻長一丈
一尺裏以紅錦束帶紅鞵雙獺尾黃金塗銅膝餘
同腰帶而狹小條環制以銅黃金塗之汗膝制
以青錦緣以銀褐錦或繡撲獸間以雲氣行膝以
絹爲之鞋制以麻鞵鞋制以皮爲履而長其鞵
縛於行膝之內雲頭鞵制以皮幫嵌雲朵頭作雲
象鞵束於脛

服色等第

一蒙古人不在禁限及見當集賽諸色人等亦不在

禁限惟不許服龍鳳文

龍謂五爪二角者

一職官除龍鳳

文外一品二品服渾金花三品服金荅子四品五品

服雲袖帶襴六品七品服六花八品九品服四花

職事

散官從一高

繫腰五品以下許用銀并減鐵

一器皿

茶謂

酒器除釵造龍鳳文不得使用外一品至三品許用金

玉四品五品惟臺盞用金六品以下臺盞用鍍金餘

並用銀 一帳幕除不得用赭黃龍鳳文外一品至
三品許用金花刺繡紗羅四品五品用刺繡紗羅六
品以下用素紗羅 一内外有出身考滿應入流見
役人員服用與九品同 一授各投下令旨鈞旨有
印信見任勾當人員亦與九品同 一庶人除不得
服赭黃惟許服暗花紵絲紬綾羅毛毳帽笠不許飾
用金玉鞵不得裁制花樣首飾許用翠花并金釵鐔
各一事惟耳環用金珠碧甸餘並用銀酒器許用銀

壺瓶臺盞盂鍤餘並禁止帳幕用紗絹不得赭黃

一諸色目人除行營帳外其餘並與庶人同 一諸

職官致仕與見任同解降者依應得品級不叙者與

庶人同 一父祖有官既没年深非犯除名不叙之

限其命婦及子孫與見任同 一諸樂藝人等服用

與庶人同凡承應妝扮之物不拘上例 一皂隸公

使人惟許服紬絹 一漢人高麗南人等投充集賽

者並在禁限

輿服志曰服色等第上得兼下下不得僭上違者
職官解見任期年後降一等叙餘人決五十七下
違禁之物付告捉人充賞有司禁治不嚴從監察
御史廉訪司究治惟御賜之物不在禁限

臣等謹按以上等第即仁宗延祐元年所定也又
王圻續通考載官民帽簷或圓或前圓後方其髮
或辮或打紗練惟庶民椎髻服用深金緣爲納奇
實或腰線繡通神欄上下均服焉附錄於此

葉世竒草木子曰紗帽圓領唐服也仕者用之中
笠襴衫宋服也中環襜領金服也帽子繫腰元服
也庶民服之

欽定續文獻通考卷九十二

欽定四庫全書

欽定續文獻通考卷九十三

王禮考

君臣冠冕服章

明太祖洪武元年二月詔衣冠如唐制 二十四年六月詔廷臣參考歷代禮制更定冠服居室器用制度

明史輿服志曰明初儉德開基重懲時弊乃命儒臣稽古講禮歷代守之遞有禁例

世宗嘉靖九年二月禁官民服舍器用踰制 十四年
二月禁冠服非制

輿服志曰帝燕居服燕弁講武用武弁更為忠靖
冠以風有位保和冠以親宗藩亦一王之制也

皇帝冕服

洪武元年學士陶安請製五冕太祖曰此禮太繁祭
天地宗廟服袞冕社稷等祀服通天冠絳紗袍餘不
用三年更定正旦冬至聖節並服袞冕祭社稷先農

冊拜亦如之十六年定袞冕之制冕前圓後方元表
纁裏前後各十二旒旒五采玉十二珠五采纁十有
二就就相去一寸紅絲組為纓黹纁充耳玉簪導袞

元衣黃裳十二章

六章織於衣日月星辰山龍華蟲
六章織於裳宗彝藻火粉米黼黻

白羅大帶紅裏蔽膝隨裳色繡龍火山文玉革帶玉

佩大綬六采

赤黃黑
白繅綠

小綬三色同大綬間施三玉環

白羅中單黻領青緣襪黃韞黃金舄飾二十六年更
家袞冕十二章冕版廣一尺二寸長二尺四寸冠上

有覆元表朱裏餘如舊制袞元衣纁裳十二章如舊制中單以素紗為之紅羅蔽膝上廣一尺下廣二尺長三尺織火龍山三章革帶佩玉長三尺三寸大帶素表朱裏兩邊用緣上以朱錦下以綠錦大綬六采真白赤元綠綠織成純元質五百首小綬三色同大綬間織三玉環朱鞞赤舄

成祖永樂三年定冕冠以皂紗為之上覆曰緹桐板為質衣之以綺元表朱裏前圓後方以玉衡維冠玉

簪貫紐紐與冠武

足前體下曰武紱在冠之下亦曰武

并繫纓處皆飾

以金紕以左右垂黹纁充耳

用黃玉

繫以元紕承以白

玉纁朱紕餘如舊制袞服十有二章元衣八章日月

龍在肩星辰山在背火華蟲宗彝在袖

每袖各二

皆織成

本色領標襕裾纁裳四章織藻粉米黼黻各二前三

幅後四幅前後不相屬共腰有辟積本色緋褐

裳側有纁

謂之緋裳下有纁謂之褐純者緣也

中單以素紗為之青領標襕裾領

織黻文十三蔽膝隨裳色四章織藻粉米黼黻各二

本色緣有紉施於縫中玉鈎二玉佩二各用玉珩一
瑀一琚二衝牙一璜二瑤下垂玉花一玉滴二瑒飾
雲龍文描金自珩而下繫紐五貫以玉珠行則衝牙
二滴與璜相觸有聲金鈎二有二小綬六采
黃白赤
元綠綠
纁質三小綬色同大綬間施三玉環龍文皆織成韞
舄皆赤色舄用黑絢純以黃飾舄首

嘉靖八年諭閣臣張璁衮冕有革帶今何不用對曰
按陳祥道禮書古革帶大帶皆謂之鞶革帶以繫佩

韍然後加以大帶而笏搢於二帶之間夫革帶前繫
韍後繫綬左右繫佩自古冕弁恒用之今惟不用革
帶以致前後佩服皆無所繫遂附屬裳要之間失古
制矣帝曰冕服祀天地享祖宗若闕革帶非齊明盛
服之意及觀會典載蔽膝用羅上織火山龍三章并
大帶緣用錦皆與今所服不合卿可并革帶繫蔽膝
佩綬之式詳考繪圖以進又云衣裳分上下服而今
衣恒掩裳裳制如帷而今兩幅朕意衣但當與裳要

齊而露裳之六章如何已又諭璫以變更祖制為疑璫對曰臣考禮制衣不掩裳與聖意允合夫衣六章裳六章義各有取大明集禮及會典與古制不異今衣八章裳四章故衣常掩裳然於典籍無所準內閣所藏圖注蓋因官司織造循習訛謬今訂正之乃復祖制非有變更帝意乃決因復諭璫曰衣有六章古以繪今當以織朕命織染局考國初冕服日月各徑五寸當從之裳六章古用繡亦當從之古色用元黃

取象天地今裳用纁於義無取當從古革帶即束帶
後當用玉以佩綬繫之於下蔽膝隨裳色其繡上龍
下火可不用山卿與內閣諸臣同考之於是楊一清
等詳議袞冕之服自黃虞以來元衣黃裳為十二章
衣六章日月星辰山龍華蟲其序自上而下
裳六章宗彝藻火粉米黼黻其序自下而上自周以
後變其制或八章或九章已戾於古矣太祖皇帝復
定為十二章之制司造之官仍習舛訛非制作之初
意帝乃令擇吉更正其制冠以圓匡烏紗冒之旒綴

七采玉珠十二青纁充耳綴玉珠二餘如舊制元衣黃裳衣裳各六章洪武間舊制日月徑五寸裳前後連屬如帷六章用繡蔽膝隨裳色羅為之上繡龍一下繡火三繫於革帶大帶素表朱裏上緣以朱下以綠革帶前用玉其後無玉以佩綬繫而掩之中單及圭俱如永樂間制朱韞赤舄黃條緣元纓結

皇帝通天冠服

洪武元年定郊廟省牲受俘皇太子諸王冠婚醮戒

則服通天冠絳紗袍冠加金博山附蟬十二首施珠翠黑介幘組纓玉簪導絳紗袍深衣製白紗內單皂領襍襪裾絳紗蔽膝白假帶方心曲領白鞬赤舄其草帶佩綬與袞服同

金博山亦名迷律如今之婦人箍也上飾以金

皇帝皮弁服

朔望視朝降詔降香進表四夷朝貢外官朝覲策士傳臚皆服之嘉靖以後祭太歲山川諸神亦服之

洪武二十六年定皮弁用烏紗冒之前後各十二縫

每縫綴五采玉十二以為飾玉簪導紅組纓其服絳紗衣蔽膝隨衣色白玉帶革帶玉鈎鐔緋白大帶白鞢黑舄

永樂三年定皮弁如舊制惟縫及冠武弁貫簪繫纓處皆飾以金絳紗袍本色領標襖裾紅裳但不織章數中單紅顏標襖裾餘俱如冕服內制

皇帝武弁服

明初親征遣將服之

嘉靖八年諭閣臣張璁云會典紀親征類禡之祭皆具武弁服不可不脩璁對周禮有韋弁謂以韎韋為弁又以為衣裳國朝視古損益有皮弁之制但皮弁以黑紗冒之今武弁如皮弁當以絳紗冒之隨具圖以進帝報曰覽圖有韠形但無繫處冠制古象上尖今皮弁則圓朕惟上銳取其輕利當如古制又衣裳韠駢皆赤色何謂且佩綬俱無於祭用之可乎璁對自古服冕弁俱用革帶以前繫韍後繫綬韋弁之韠

正繫於革帶耳武事尚威烈故色純用赤帝復報璽
冠服衣裳鞞舄俱如古制增革帶佩綬及圭乃定制
弁上銳色用赤上十二縫中綴五采玉落落如星狀
鞞衣鞞裳鞞鞞俱赤色佩綬革帶如常制佩綬及鞞
鞞俱上繫於革帶舄如裳色

皇帝常服

洪武三年定烏紗折角向上巾盤領窄袖袍束帶間
用金琥珀透犀

永樂三年更定冠以烏紗冒之折角向上其後名翼
善冠袍黃盤領窄袖前後及兩肩各織金盤龍一帶
用玉韉以皮為之

輿服志曰先是洪武二十四年帝微行至神樂觀
見有結網巾者翼日命取網巾頒示十三布政使
司人無貴賤皆裹網巾於是天子亦常服網巾

會典

載皇太孫冠禮有云掌冠跪加網巾
而皇帝皇太子冠服俱闕而不載

嘉靖七年更定燕弁服初帝以燕居冠服尚沿習俗

諭張璠考古帝王燕居法服之制璠乃采禮書元端
深衣之文圖注以進帝為參定其制諭璠詳議璠言
古者冕服之外元端深衣其用最廣元端自天子達
於士國家之命服也深衣自天子達於庶人聖賢之
法服也今以元端加文飾不易舊制深衣易黃色不
離中衣誠得帝王損益時中之道帝因諭禮部曰古
元端上下通用今非古人比雖燕居宜辨等威因酌
古制更名曰燕弁寓深宮獨處以燕安為戒之意其

制冠匡如皮弁之制冒以烏紗分十有二瓣各以金線壓之前飾五采玉雲各一後列四山朱條為組纓雙玉簪服如古元端之制色元邊緣以青兩肩繡日月前盤圓龍一後盤方龍二邊加龍文八十一領與兩祛共龍文五九袷同前後齊共龍文四九襯用深衣之制色黃袂圓祛方下齊負繩及踝十二幅素帶朱裏青表綠緣邊腰圍飾以玉龍九元履朱緣紅纓黃結白鞵

皇太子冠服

凡陪祀天地社稷宗廟及大朝會受冊納妃則服袞

冕

洪武二十六年定袞冕九章冕九旒旒九玉金簪導

紅組纓兩玉珥元衣纁裳

衣五章纁山龍華蟲宗彝火裳四章纁藻粉米黼黻

白紗中單黻領蔽膝隨裳色織火山二章革帶金鈎

鰐玉佩綬五采

赤白元綠綠

織成純赤質三百三十首小

綬三色同間織三玉環大帶白表朱裏上緣以紅下

緣以綠白韞赤舄

永樂三年定冕冠元表朱裏前圓後方前後各九旒

每旒五采纁九就貫五采玉九

赤白青黃黑相次

玉衡金簪

元紬垂青纁充耳

用青玉

承以白玉瑱朱紘纓袞服九

章元衣五章龍在肩山在肩火華蟲宗彝在袖

每袖各三

皆織成本色領標襍裾纁裳四章織藻粉米黼黻各

二前三幅後四幅不相屬共腰有褱積本色緦褐中

單以素紗為之青領標襍裾領織黻文十二蔽膝隨

裳色四章織藻粉米黼黻本色綠有紉施於縫中上

玉鈎二玉佩二各用珩一瑀一琚一衝牙一璜三瑤

下垂玉花一玉滴二瑒雲龍文描金白珩而下繫組

五貫以玉珠上有金鈎小綬四采

赤白
綠綠

以副之纁質

大帶表表朱裏在腰及垂皆有緋上緋以朱下緋以

綠紐約用青組大綬四采

赤白
綠綠

纁質小綬三采間施

二玉環龍文皆織成韞舄皆赤色舄用黑鈎純黑飾

舄首朔望朝降詔降香進表外國朝貢朝覲則服

皮弁皮弁冒以烏紗前後各九縫每縫綴五采玉九縫及冠武弁貫簪繫纓處皆飾以金金簪朱纓絳紗袍本色領襖襖裾紅裳如冕服內裳制但不織章數中單以素紗為之如深衣制紅領襖襖裾領織黻文十一蔽膝隨裳色本色緣有紃施於縫中其上玉鈎二玉佩如冕服內制但無雲龍文有小綬四采以副之大帶大綬鞞舄赤色皆如冕服內制

常服洪武元年定烏紗折上巾永樂三年定冠烏紗

折角向上巾

親王郡王及世子俱同

袍赤盤領窄袖前後及兩

肩各金織盤龍一玉帶鞞以皮為之

親王冠服

助祭謁廟朝賀受冊納妃服袞冕朔望朝降詔降香
進表四夷朝貢朝覲服皮弁

洪武二十六年定冕服俱如東宮第冕旒用五采青
衣纁裳

永樂三年又定冕服皮弁制俱與東宮同其常服亦

如之

嘉靖七年諭禮部朕仿古元端自為燕弁冠服更制忠靜冠服錫於有位而宗室諸王制猶未備令酌燕弁及忠靜冠之制復為式具圖命曰保和冠服自郡王長子以上其式已明鎮國將軍以下至奉國中尉及長史審理紀善教授伴讀俱用忠靜冠服依其品服之儀賓及餘官不許僭服夫忠靜冠服之異式尊賢之等也保和冠服之異式親親之殺也等殺既明

庶幾乎禮之所保保斯和和斯安此錫名之義也其
以圖說頒示諸王府如敕遵行保和冠制以燕弁為
準用九袞去簪與五玉後山一扇分畫為四服青質
青緣前後方龍補身用素地邊用雲襖用深衣玉色
帶青表綠裏綠緣履用皂綠結白鞵

親王世子觀服

聖節千秋節并正旦冬至進賀表箋及父王生日諸
節慶賀皆服袞冕

洪武二十六年定袞冕七章冕三采玉珠七旒青衣

三章

織半羔
大宗彛

纁裳四章

織藻粉
朱黼黻

素紗中單青領襖赤

韎革帶佩白玉元組綬綬紫質用三采

紫黃
赤

織成間

織三白玉環白韎赤舄

永樂三年更定冕冠前後各八旒每旒五采纁八就

貫三采玉珠八

赤白青
色相次

青衣三章火在肩華蟲宗彛

在兩袖皆織成本色領標襖裾其纁裳玉佩帶綬之
制俱與親王同第領織黻文減二皮并用烏紗冒之

前後各八縫每縫綴三采玉八餘制如親王其圭佩帶綬韞舄如冕服內制常服亦與親王同

嘉靖七年定保和冠服以燕弁為準用八袞去簪玉後山以一扇分畫為四服與親王同

郡王冠服

永樂三年定冕冠前後各七旒每旒五采縹七就貫三采玉珠七青衣三章粉米在肩藻宗彝在兩袖皆織成纁裳二章織黼黻各二中單領織黻文七皮弁

前後各七縫每縫綴五采玉七餘及常服與親王世子同其圭佩帶綴鞬舄如冕服內制

嘉靖七年定保和冠服冠用七襖服與親王世子同郡王長子朝服

七梁冠大紅素羅衣白素紗中單大紅素羅裳及蔽膝大紅素羅白素紗二色夾帶玉朝帶丹礬紅花錦錦雞綬玉佩象笏白絹鞬皂皮雲頭履鞬公服皂綯紗幘頭大紅素紵絲衣玉革帶常服烏紗帽大紅紵

絲織金獅子開襖圓領玉束帶皂皮銅線鞞其保和
冠如忠靜之制用五襖服與郡王同補子用織金方
龍

鎮國將軍以下冠服

鎮國將軍冠服與郡王長子同輔國將軍冠服與鎮
國將軍同惟冠六梁帶用犀奉國將軍冠服與輔國
將軍同惟冠五梁帶用金釵花常服大紅織金虎豹
鎮國中尉冠服與奉國將軍同惟冠四梁帶用素金

佩用藥玉輔國中尉冠服與鎮國中尉同惟冠三梁帶用銀釵花綬用盤雕公服用深青素羅常服紅織金熊羆奉國中尉冠服與輔國中尉同惟冠二梁帶用素銀綬用練鵲幘頭黑漆常服紅織金彪

明法傳錄曰文皇既殺駙馬都尉梅殷公主詰駙馬安在帝遽命取二帶來一金一玉曰與二甥長順昌都督次指揮僉事則都督帶亦用玉與郡王長子同次指揮僉事金帶與奉國將軍同又永樂

元年籍長興侯耿炳文家服器飾龍鳳玉帶用紅
鞵皆以為僭罪之

羣臣冠服

洪武元年命制公服朝服以賜百官時禮部言各官
先授散官與見任職事高下不同如御史董希哲前
授朝列大夫澧州知州而任七品職事省司郎中宋
冕前授亞中大夫黃州知府而任五品職事散官與
見任之職不同故服色不能無異乞定其制乃詔省

部臣定議禮部復言唐制服色皆以散官為準元制散官職事各從其高者服色因之國初服色依散官與唐制同乃定服色準散官不計見職於是所賜袍帶亦並如之三年禮部言歷代異尚夏黑商白周赤秦黑漢赤唐服飾黃旗幟赤今國家承元之後取法周漢唐宋服色所尚於赤為宜從之

文武官朝服

洪武二十六年定凡大祀慶成正旦冬至聖節及頒

詔開讀進表傳制俱用梁冠赤羅衣白紗中單青飾
領緣赤羅裳青緣赤羅蔽膝大帶赤白二色絹革帶
佩綬白鞢黑履一品至九品以冠上梁數為差公冠
八梁加籠巾貂蟬立筆五折四柱香草五段前後玉
蟬侯七梁籠巾貂蟬立筆四折四柱香草四段前後
金蟬伯七梁籠巾貂蟬立筆二折四柱香草二段前
後玳瑁蟬俱挿雉尾駙馬與侯同不用雉尾一品冠
七梁不用籠巾貂蟬革帶與佩俱玉綬用黃綠赤紫

織成雲鳳四色花錦下結青絲網玉綬環二二品六
梁革帶綬環犀餘同一品三品五梁革帶金佩玉綬
用黃綠赤紫織成雲鶴花錦下結青絲網金綬環二
四品四梁革帶金佩藥玉餘同三品五品三梁革帶
銀釵花佩藥玉綬用黃綠赤紫織成盤雕花錦下結
青絲網銀鍍金綬環二一品至五品笏俱象牙六品
七品二梁革帶銀佩藥玉綬用黃綠赤織成練鵲三
色花錦下結青絲網銀綬環二獨御史服獬廌八品

九品一梁革帶烏角佩藥玉綬用黃綠織成鴻鵠二
色花錦下結青絲網銅綬環二六品至九品笏俱槐
木其武官應直守衛者別有服色雜職未入流品者
大朝賀進表行禮止用公服三十年令視九品官用
朝服

嘉靖八年更定朝服之制梁冠如舊式上衣赤羅青
緣長過腰指七寸毋掩下裳中單白紗青緣下裳七
幅前三後四每幅三襞積赤羅青緣蔽膝綴革帶綬

各從品級花樣革帶之後佩綬繫而掩之其環亦各從品級用玉犀金銀銅不以織於綬大帶表裏俱素惟兩耳及下垂緣綠又以青組約之革帶俱如舊式佩玉一如詩傳之制去雙滴及二珩其三品以上玉四品以下藥玉及鞢履如舊式

神宗萬曆五年令百官正旦朝賀毋僭躡朱履故事十一月百官戴煖耳是年朝覲外官及舉人監生不許戴煖耳入朝

洪武實錄三年七月命省部會弘文館學士劉基等參考歷代制度作各官朝服公服給賜凡大朝會天子袞冕御殿則服朝服見皇太子服公服十月詔凡朝覲辭謝官皆公服其或常服見者綴班後如以軍務遠來及承制使還即時引見者不在此例

祭服

凡親祀郊廟社稷文武官分獻陪祀則服之

洪武二十六年定一品至九品青羅衣白紗中單俱
皂領緣赤羅裳皂緣赤羅蔽膝方心曲領其冠帶佩
綬等差並同朝服又定品官家用祭服三品以上去
方心曲領四品以下並去佩綬

嘉靖八年更定百官祭服上衣青羅皂緣下裳赤羅
皂緣蔽膝綬環大帶革帶佩玉鞢履俱與朝服同其
視牲朝日夕月耕藉祭歷代帝王獨錦衣衛堂上官
大紅蟒衣飛魚烏紗帽鸞帶佩繡春刀祭太廟社稷

則大紅便服

文武官公服

洪武二十六年定每日早晚朝奏事及侍班謝恩見
辭則服之在外文武官每日公座服之其制盤領右
衽袍用紵絲或紗羅絹袖寬三尺一品至四品緋袍
五品至七品青袍八品九品綠袍未入流雜職官袍
笏帶與八品以下同公服花樣一品大獨科花徑五
寸二品小獨科花徑三寸三品散搭花無枝葉徑二

十四品五品小雜花紋徑一寸五分六品七品小雜
花徑一寸八品以下無紋幘頭漆紗二等展角長一
尺二寸雜職官幘頭垂帶後復令展角不用垂帶與
入流官同笏依朝服為之腰帶一品玉或花或素二
品犀三品四品金荔枝五品以下烏角鞵用青革仍
垂撻尾於下鞵用皂其後常朝止便服惟朔望具公
服朝參凡武官應直守衛者別有服色不拘此制公
候駙馬伯服色花樣腰帶與一品同文武官花樣如

無從織造則用素百官入朝雨雪許服雨衣奉天華
蓋武英諸殿奏事必躡履鞮違者御史糾之

萬曆五年令常朝俱衣本等錦繡服色其朝覲官見
辭謝恩不論已未流公服行禮

文武官常服

洪武三年定凡常朝視事以烏紗帽團領衫束帶為
公服其帶一品玉二品花犀三品金釵花四品素金
五品銀釵花六品七品素銀八品九品烏角凡致仕

及侍親辭閒官紗帽束帶為事黜降者服與庶人同

至二十四年又定公侯伯駙馬束帶與一品同雜職官與八品九品同

六年定朝官常服

禮鞮先是百官入朝遇雨皆躡釘鞮聲徹殿陛侍儀司請禁之帝曰古者入朝有履自唐始用鞮其令朝官為鞮底皮鞮冒於鞮外出朝則釋之禮部言近奢侈越制詔申禁之仍參酌漢唐之制頒行遵守凡職官一品二品用雜色文綺綾羅綵繡帽頂帽珠用玉三品至五品用雜色文綺綾羅帽頂用金帽珠除玉

外隨所用六品至九品用雜色文綺綾羅帽頂用銀帽珠瑪瑙水晶香木一品至六品穿四爪龍以金繡為之者聽禮部又議品官見尊長用朝君公服於理未安宜別製梁冠絳衣絳裳革帶大帶大白韞烏舄佩綬其衣裳去緣襪三品以上佩綬三品以下不用從之二十二年令文武官遇雨戴雨帽公差出外戴帽子入城不許二十三年定制文官衣自領至裔去地一寸袖長過手復回至肘公侯駙馬與文官同武

官去地五寸袖長過手七寸二十四年定公侯駙馬
伯服繡麒麟白澤文官一品仙鶴二品錦雞三品孔雀
四品雲雁五品白鵬六品鷺鷥七品鸂鶒八品黃鸝
九品鸛鶉雜職練鵲風憲官獬廌武官一品二品
獅子三品四品虎豹五品熊羆六品七品彪八品犀
牛九品海馬又令品官常服用雜色紵絲綾羅綵繡
官吏衣服帳幔不許用元黃紫三色并織繡龍鳳文
違者罪及染造之人朝見人員四時并用色衣不許

純素三十年令致仕官服色與見任同若朝賀謝恩
見辭一體具服

景帝景泰四年令錦衣衛指揮侍衛者得衣麒麟
英宗天順二年定官民衣服不得用蟒龍飛魚斗牛
大鵬像生獅子四寶相花大西番蓮大雲花樣并元
黃紫及元色黑綠柳黃薑黃諸色

孝宗弘治十三年奏定公侯伯文武大臣及鎮守守
備違例奏請蟒衣飛魚衣服者科道糾劾治以重罪

武宗正德十一年設東西兩官廳將士悉衣黃罩甲
中外化之金緋盛服者亦必加此於上都督江彬等
承日紅笠之上綴以靛染天鵝領以為貴飾貴者飄
三英次者二英兵部尚書王瓊得賜一英冠以下教
場自謂殊遇其後巡狩所經督餉侍郎巡撫都御史
無不依罩甲見上者十三年車駕還京傳旨俾迎候
者用曳撒大帽鸞帶尋賜羣臣大紅紵絲羅紗各一
其服色一品斗牛二品飛魚三品蟒四品麒麟六

七品虎彪翰林科道不限品級皆與馬惟部曹五品
下不與時文臣服色亦以走獸而麒麟之服逮於四
品尤異事也十八年世宗已即位登極詔云近來冒
濫玉帶蟒龍飛魚斗牛服色皆庶官雜流并各處將
領黃緣奏乞今俱不許武職卑官僭用公侯服色者
亦禁絕之

嘉靖六年復禁中外官不許濫服五彩裝花織造違
禁顏色七年既定燕居法服之制閣臣張璁因言品

官燕居之服未有明制詭異之徒競為奇服以亂典章乞更法古元端別為簡易之制昭布天下使貴賤有等帝因復製忠靜冠服圖頒禮部敕諭之曰祖宗稽古定制品官朝祭之服各有等差第常人之情多謹於明顯怠於幽獨古聖王慎之制元端以為燕居之服比來衣服詭異上下無辨民志何由定朕因酌古元端之制更名忠靜庶幾乎進思盡忠退思補過焉朕已著為圖說如式製造在京許七品以上

官及八品以上翰林院國子監行人司在外許方面
官及各府堂官州縣正堂儒學教官服之武官止都
督以上餘不許濫服禮部以圖說頒天下如敕奉行

也靜冠仿古元冠冠匡如制以烏紗冒之兩山俱列
於後冠頂仍方中微起三梁各壓以金線邊以金絲
之四品以下去金絲以淺色絲線忠靜服仿古元端
服色用深青以紵絲線羅為之三品以上雲四品以
下素緣以藍青前後飾本等花樣補子深衣用玉色
素帶如古大夫之帶刺青表絲絲邊并裏青履青絲
修造
白襪
十六年羣臣朝於駐蹕所兵部尚書張瓚服蟒

帝怒諭閣臣夏言曰尚書二品何自服蟒言對曰瓚

所服乃欽賜飛魚服鮮明類蟒耳帝曰飛魚何組角其嚴禁之於是禮部奏定文武官不許擅用蟒衣飛魚斗牛違禁華異服色其大紅紵絲紗羅服惟四品以上官及在京五品堂上官經筵講官許服五品官及經筵不為講官者俱服青綠錦繡遇吉禮止衣紅布絨褐品官花樣並依品級錦衣衛指揮侍衛者仍得衣麒麟其帶俸非侍衛及千百戶雖侍衛不許僭用

賜服

文臣有未至一品而賜玉帶者自洪武中學士羅復
仁始行聖公秩正二品服織金麒麟袍玉帶則景泰
中入朝拜賜自是以為常內閣賜蟒衣自弘治中劉
健李東陽始麒麟本公侯服而內閣服之則嘉靖中
嚴嵩徐階皆受賜也仙鶴文品一品服也嘉靖中成
國公朱希忠都督陸炳服之皆以元壇供事而學士
嚴訥李春芳董份以五品撰青詞亦賜仙鶴尋諭供

事壇中乃用於是尚書皆不敢衣鶴後敕南京織閃黃補麒麟仙鶴賜嚴嵩閃黃乃上用服色也又徐階及萬厯中張居正皆賜蟒服武清侯李偉以太后父亦受賜

儀賓冠服

凡朝服公服常服俱視品級與文武官同惟笏皆象牙常服花樣視武官弘治十三年定郡主儀賓釵花金帶胸背獅子縣主儀賓釵花金帶郡君儀賓光素

金帶胸背俱虎豹縣君儀賓釵花銀帶鄉君儀賓光
素銀帶胸背俱彪有僭用者革去冠帶戴平頭巾於
儒學讀書習禮三年

狀元及諸進士冠服

狀元冠二梁緋羅圓領白絹中單錦綬蔽膝紗帽槐
木笏光銀帶藥玉佩朝鞞韁襪皆御前頒賜上表謝
恩日服之進士巾如烏紗帽頂微平展角潤寸餘長
五寸許系以垂帶皂紗為之深藍羅袍緣以青羅袖

廣而不殺槐木笏革帶青鞵飾以黑角垂撻尾於後
廷試後頒於國子監傳臚日服之上表謝恩後謁先
師行釋菜禮畢始易常服其中袍仍送國子監藏之
內外官親屬冠服

洪武元年禮部尚書崔亮奉詔議定內外官父兄伯
叔子孫弟姪用烏紗帽軟腳垂帶圓領衣烏角帶二
十五年令文武官父兄伯叔弟姪子婿皆許穿鞵
內使冠服

洪武初置內使監冠烏紗描金曲脚帽衣胸背花盤
領窄袖衫烏角帶鞞用紅扇面黑下襜各宮火者服
與庶人同三年諭宰臣內使監未有職名者當別製
冠以別監官禮部奏定內使監凡遇朝會依品具朝
服公服行禮其常服葵花胸背團領衫不拘顏色烏
紗帽犀角帶無品從者常服團領衫無胸背花不拘
顏色烏角帶烏紗帽垂軟帶年十五以下者惟帶烏
紗小頂帽

弘治二年都御史邊鏞言國朝品官無蟒衣之制蟒
無角無足今內官多乞蟒衣殊類龍形非制也乃下
詔禁之十七年諭閣臣劉健曰內臣僭妄尤多因言
服色所宜禁曰蟒龍飛魚斗牛本在所禁不合私織
間有賜者或久而敝不宜輒自織用元黃紫皂乃屬
正禁即柳黃明黃薑黃諸色亦應禁之孝宗加意鉗
束故申飭者再然內官驕恣已久積習相沿不能止
輿服志初太祖制內臣服其紗帽與羣臣異且無

朝冠幘頭亦無祭服萬厯初穆宗主入太廟大璫
冠進賢服祭服以從蓋內府祀中霤竈井之神例
遣中官因自創為祭服非由廷議也

臣等謹按大政記永樂以後宦官在帝左右必蟒
服製如曳撒繡蟒於左右係以鸞帶此燕閒之服
也次則飛魚惟入侍用之貴而用事者賜蟒文武
一品官所不易得也單蟒面皆斜向坐蟒則面正
向尤貴又有膝襴者亦如曳撒上有蟒補當膝處

橫織細雲蟒蓋南郊及山陵扈從便於乘馬也或
召對燕見君臣皆不用袍而用此第蟒有五爪四
爪之分襴有紅黃之別耳附錄於此

侍儀舍人冠服

洪武二年禮官議定侍儀舍人導禮依元制展脚幘
頭窄袖紫袍塗金束帶皂紋鞞常服烏紗唐帽諸色
盤領衫烏角束角衫不用黃四年中書省議定侍儀
舍人併御史臺知班引禮執事冠進賢冠無梁服絳

色衣其蔽膝履韞帶笏與九品同惟不用中單

校尉冠服

洪武三年定制執仗之士首服皆縷金額交脚幘頭

其服有諸色辟邪寶相花羣襖銅葵花束帶皂紋鞞

六年令校尉衣只孫

只孫本元制已見前

束帶幘頭鞞鞞十四

年改用金鵝帽黑漆戣金荔枝銅釘樣每五釘攢就

四面稍起邊襴鞞青繫束之二十二年令將軍力士

校尉旂軍常戴頭巾或襍腦二十五年令校尉力士

上直穿鞞出外不許

刻期冠服

宋置快行親從官明初謂之刻期冠方頂巾衣胸背
鷹鷄花腰線襖子諸色闊匾絲條大象牙雕花環行
膝八帶鞞洪武六年惟用雕刻象牙條環餘同庶民
儒士生員監生巾服

洪武三年令士人帶四方平定巾二十三年定儒士
生員衣自領至領去地一寸袖長過手復回不及肘

三寸二十四年以士子巾服無異吏胥宜甄別之命
工部制式以進帝親視凡三易乃定生員襴衫用玉
色布絹為之寬袖皂緣皂條軟巾垂帶貢舉入監者
不變所服洪武末許戴遮陽帽後遂私戴之至洪熙
中帝問衣藍者何人左右以監生對帝曰著青衣較
好乃易青圓領

嘉靖二十二年禮部言士子冠服詭異有凌雲等巾
甚乖禮制詔所司禁之

萬曆二年禁舉人監生生儒僭用忠靜冠巾錦綺鑲履及張繖蓋戴煖耳違者五城御史送問

楊維禎戴方巾見帝

帝問此巾何名對曰四方平定巾帝喜命天下儒士皆戴之

庶人冠服

洪武初庶人婚許假九品服三年庶人初戴四帶巾改四方平定巾雜色盤領衣不許用黃又令男女衣服不得僭用金繡錦綺紵絲綾羅止許綢絹素紗其鞞不得裁製花樣金線裝飾首飾釵鐲不許用金玉

珠翠止用銀六年令庶人巾環不得用金玉瑪瑙珊瑚琥珀未入流品者同庶人帽不得用頂帽珠止許水晶香木十四年令農衣紬紗絹布商賈止衣絹布農家有一人為商賈者亦不得衣紬紗二十二年令農夫戴斗笠蒲笠出入市井不禁不親農業者不許二十三年令耆民衣制袖長過手復回不及肘三寸庶人衣長去地五寸袖長過手六寸袖樁廣一尺袖口五寸二十五年以民間違禁鞞巧裁花樣嵌以金

線藍條詔禮部嚴禁庶人不許穿鞢止許穿皮扎鞢
惟北地苦寒許用牛皮直縫鞢

正德元年禁商販僕役倡優下賤不許復用貂裘十
六年禁軍民衣紫花罩甲或禁門或四外遊走者緝
事人禽之

協律郎樂舞生冠服

明初郊社宗廟用雅樂協律郎幞頭紫羅袍荔枝帶
樂生緋袍展脚幞頭舞士幞頭紅羅袍荔枝帶皂鞢

文舞生紅袍武舞生緋袍俱展脚幞頭革帶皂鞢朝
會大樂九奏歌工中華一統巾紅羅生色大袖衫畫
黃鶯鸚鵡花樣紅生絹襯衫錦領杏紅絹裙白絹大
口袴青紗條白絹襪茶褐鞢其和聲郎押樂者皂羅
潤帶巾青羅大袖衫紅生絹襯衫錦領塗金束帶皂
鞢其三舞一武舞曰平定天下之舞舞士皆黃金束
髮冠紫絲纓青羅生色畫舞鶴花樣窄袖衫白生絹
襯衫錦領紅羅銷金大袖罩袍紅羅銷金裙皂生色

畫花緣襖白羅銷金汗袴藍青羅銷金緣紅絹擁項
紅結子紅絹束腰塗金束帶青絲大條錦臂鞞綠雲
頭皂鞞舞師黃金束髮冠紫絲纓青羅大袖衫白絹
襯衫錦領塗金束帶綠雲頭皂纓一文舞曰車書會
同之舞舞士皆黑光描金方山冠青絲纓紅羅大袖
衫紅生絹襯衫錦領紅羅擁項紅結子塗金束帶白
絹大口袴白絹襪茶褐鞞舞師冠服與舞士同惟大
袖衫用青羅不用紅羅擁項紅結子一文舞曰撫安

四夷之舞舞士東夷四人椎髻於後繫紅銷金頭繩
紅羅銷金抹額中綴塗金博山兩傍綴塗金巾環明
金耳環青羅生色畫花大袖衫紅生色領袖紅羅銷
金裙青銷金裙緣紅生絹襯衫錦領塗金束帶烏皮
鞞西戎四人間道錦纏頭明金耳環紅紵絲細褶襖
子大紅羅生色雲肩綠生色綠藍青羅銷金汗袴紅
銷金緣繫腰合鉢十字泥金數珠五色銷金羅香囊
紅絹擁項紅結子赤皮鞞南蠻四人綰朝天髻繫紅

羅生色銀錠紅銷金抹額明金耳環紅織金短襖子
綠織金細摺短裙絨錦袴間道紵絲手巾泥金頂牌
金珠瓔珞綴小金鈴錦行纏泥金獅蠻帶綠銷金擁
頂紅結子赤皮鞢北翟四人戴單于冠貂鼠皮簷雙
垂髻紅銷金頭繩紅羅銷金抹額諸色細褶襖子藍
青生色雲肩紅結子紅銷金汗袴繫腰合鉢皂皮鞢
其舞師皆戴白捲簷氍帽塗金帽頂一撒紅纓紫羅
帽襖紅綠金繡襖子白銷金汗袴藍青銷金綠塗金

束帶綠擁項紅結子赤皮鞞凡大樂工及文武二舞
樂工皆曲脚幞頭紅羅生色畫花大袖衫塗金束帶
紅絹擁項紅結子皂皮鞞四夷樂土皆蓮花帽諸色
細摺襖子白銷金汗袴紅銷金緣紅綠絹束腰紅羅
擁項紅結子花鞞永樂間定殿內侑食樂奏平定天
下之舞引舞樂工皆青羅包巾青紅綠玉色羅銷金
胸背襖子渾金銅帶紅羅褶襖雲頭皂鞞青綠羅銷
金包臀舞人服色如之奏撫安四夷之舞高麗舞四

人皆笠子青羅銷金胸背襖子銅帶皂鞢琉球舞四
人皆棉布花手巾青羅大袖襖子銅帶白碾光絹間
道踢袴皂皮鞢北番舞四人皆狐帽青羅紵絲銷金
襖子銅帶伍魯速回回舞四人皆青羅帽比里罕棉
花布手巾銅帶皂鞢奏車書會同之舞舞人皆皂羅
頭巾青綠玉色皂沿邊襖茶褐線條皂皮四縫鞢奏
表正萬邦之舞引舞二人青羅包巾紅羅銷金頂帕
紅生絹錦領中單紅生絹銷金通袖襖子青線條銅

帶織錦臂鞞雲頭皂鞞各色銷金包臀紅絹裕襴舞
人樂工服色與引舞同奏天命有德之舞引舞二人
青幪紗如意冠紅生絹錦領中單紅生絹大袖袍各
色絹采畫直纏黑角偏帶藍絹綵雲頭皂鞞白布襪
舞人樂工服色與引舞同

齋郎樂生文武舞生冠服

洪武五年定齋郎黑介幘漆布為之無花樣服紅絹
窄袖衫紅生絹為裏皂皮四縫鞞黑角帶文舞生及

樂生黑介幘漆布為之上加描金蟬服紅絹大袖袍
胸背畫纏枝方葵花紅生絹為裏加錦臂鞞二皂皮
四縫鞞黑角帶武舞生武弁以漆布為之上加描金
蟬服飾鞞帶並同文舞生

嘉靖九年定文武舞生服制園丘服青紵絲方澤服
黑緣紗朝日壇服赤羅夕月壇服玉色羅

教坊司冠服

洪武三年定教坊司樂藝青巾字頂巾繫紅綠裕襖

御前供奉俳長鼓吹冠紅羅胸背小袖袍紅絹裕襴
皂鞢色長鼓吹冠紅青羅紵絲彩畫百花袍紅絹裕
襴歌工弁冠紅羅織錦胸背大袖袍紅生絹錦領中
單黑角帶紅熟絹錦脚袴皂皮琴鞢白棉布夾襪樂
工服色與歌工同凡教坊司官常服冠帶與百官同
至御前供奉執粉漆笏服黑漆幘頭黑綠羅大袖襴
袍黑角偏帶皂鞢教坊司伶人常服綠色巾以別士
庶之服樂人皆戴鼓吹冠不用錦條惟紅裕襴服色

不拘紅綠樂人衣服止用明綠桃紅玉色水紅茶褐
色俳優長樂工俱皂頭巾雜色條

王府樂人冠服

洪武十五年定凡朝賀用大樂宴禮七奏樂樂工俱
紅絹彩畫胸背方花小袖單袍有花鼓吹冠錦臂鞢
皂鞢抹額以紅羅彩畫束腰以紅絹其餘樂工用綠
絹彩畫胸背方花小袖單袍無花鼓吹冠抹額以紅
絹彩畫束腰以紅絹

軍士服

洪武元年令製衣表裏異色謂之鴛鴦戰襖以新軍號二十一年定旂手衛軍士力士俱紅胖襖其餘衛所胖襖如之凡胖襖長齊膝窄袖內實以棉花二十年令騎士服對襟衣便於乘馬也不應服而服者罪之

皂隸公人冠服

洪武三年定皂隸圓頂巾皂衣四年定皂隸公使人

皂盤領衫平頂巾白褶襖帶錫牌十四年令各衙門
祇禁原服皂衣改用淡青二十五年皂隸伴當不許
著鞞止用皮扎鞞

外國君臣冠服

洪武二年高麗入朝請祭服制度命製給之二十七
年定蕃國朝貢儀國王來朝如嘗賜朝服者服之以
朝三十一年賜琉球國王併其臣下冠服永樂中賜
琉球中山王皮弁玉圭麟袍犀帶視二品秩宣德三

年朝鮮國王李裨言洪武中蒙賜國王冕服九章陪
臣冠服比朝廷遞降二等故陪臣一等比朝臣第三
等得五梁冠服永樂初先臣芳遠遣世子禔入朝蒙
賜五梁冠服臣竊惟世子冠服何至同陪臣一等乞
為定制乃命製六梁冠賜之嘉靖六年令外國朝貢
人不許擅用違制衣服如違賣者買者同罪

僧道服

洪武十四年定禪僧茶褐常服青條玉色袈裟講僧

玉色常服綠條淺紅袈裟教僧皂常服黑條淺紅袈裟僧官如之惟僧錄司官袈裟綠文及環皆飾以金道士常服青法服朝衣皆赤道官亦如之惟道錄司官法服朝服綠衣飾金凡在京道官紅道衣金襴木簡在外道官紅道衣木簡不用金襴道士青道服木簡

欽定續文獻通考卷九十三